

# Powšitkowne WOZJEWJENJA

njedźelu, 28. julija 2019

## Gig-festiwal w Róžeńće

W Róžeńće zakónči so tutu njedźelu, 28. julija, Gig-festiwal. Swjatočnej Božej mši, kotraž je w 10 hodź., přizamknje so koncert gospeloweho chóra a skupiny I AM. W 14.00 hodź. budže podijowa diskusija z třomi měšnikami wo temje „Bóh a naš swět“. Po wječeri slěduje w 19.00 hodź. eucharistiski nyšpor w cyrkwi. Z diskoteku wot 20.30 hodź. na dworje so Gig-festiwal zakónči. Wšitcy – młodostni runje tak kaž starši a swójby z džěćimi – su wutrobnje do Róžanta přeprošeni. Nadrobny program je w interneće pod [www.gigfestival.de](http://www.gigfestival.de) wozjewjeny.

## Z busom do Krupki kemši

Na putniku Božu mšu srjedu, 31. julija, w 10 hodź. w Krupce pojedže zaso bus. Štóz chcył hišće sobu jěć, měł so najpozdzišo hač do pónđzele, 29. julija, w Šmitec wozydłownistwje w Radworju přizjewić, telefonowe čisło (03 59 35) 28 60.

## Swjata spowědź w Róžeńće

Wšitcy, kotřiž chcyli porciunkulski wotpusk dobyć, maja mjez druhim w Róžeńće składnosć, sakrament swjateje spowědže přijěć, a to sobotu, 3. awgusta, wot 17 do 18 hodź. Spowědnicy budu fararjo Michał Anders, Šćěpan Delan, Beno Jakubaš a dr. Daniel Dzikiewicz.

## Spěwny wječor na Kukowskim hrodźišću

Młodostnych a wšitkich zajimcow přeprašujemy na spěwny wječor, kotryž zahaji so pjatk, 9. awgusta, w 19.00 hodź. na Kukowskim hrodźišću. Při tym móža wšitcy nowy młodžinski spěwnik „Na puć z nami“ zeznać a při lěhwowym wohenju spěwać, hudźić a Boha chwalić. Wjeselimo so na was! *Dekanatne dušepastyrstwo za młodžinu*

## „Žiwjenju křidła dać“

Dom biskopa Bena w Smochćicach přeprašuje wšitkich, kotřiž sami bydla, wot soboty do njedźele, 31. awgusta, do 1. septembra, na zhromadnej dnjej z druhimi singlemi. Pod hesłom „Žiwjenju křidła dać“ poskića so wšelake temowe koła a zhromadne akcije. Nadrobniše informacije dóstanu zajimcy pola Ansgara Hoffmanna, telefonowe čisło (03 59 35) 2 23 17 abo w interneće pod [www.benno-haus.de](http://www.benno-haus.de).

